

人壽金鑑

人壽金鑑卷第四

安東程得齡與九氏輯

八歲

後漢書曰馮勤字偉伯魏郡繁陽人也八歲善計

計算術也

又曰承宮字少子琅邪姑幕人年八歲爲人牧豕鄉里徐子盛者以春秋經授諸生數百人宮過息廬下樂其業因就聽經遂請畱門下爲諸生拾薪執苦數年勤學不倦經典旣明乃歸家教授

魏志注曰鍾會字士季八歲誦詩

又曰任昭先名嘏樂安博昌人世爲著姓夙智早成故鄉人爲之語曰蔣氏翁任氏童嘏八歲喪母號泣不絕聲自然之哀同於成人故幼以至性見稱

蜀志曰諸葛瞻字思遠建興十二年亮出武功與兄瑾書曰瞻今已八歲聰慧可愛嫌其蚤成恐不爲重器耳

吳志曰駱統字公緒會稽人父俊官至陳相爲袁術所害統母改適爲華歆小妻統時八歲遂與親客歸會稽其母送之拜辭上車面而不顧其母泣涕於後御者曰夫人猶在也統曰不欲增母思故不顧耳事嫡母甚謹

又注曰山陰丁覽字孝連八歲而孤家又單微清身立行用意不苟推財從弟以義讓稱

晉書曰扶風武王駿字子臧幼聰慧年五六歲能書疏諷誦經籍見者奇之齊王芳立駿年八歲爲散騎常侍侍講焉

又曰樂廣字彥輔南陽濟陽人也父方參魏征西將軍夏侯元軍事廣時年八歲元常見廣在路因呼與語還謂方曰向見廣

神姿朗徹當爲名士卿家雖貧可令專學必能興卿門戶也

又曰裴秀字季彥八歲能屬文

又曰嵇康與濤書告絕曰男年八歲未及成人况復多疾

又曰謝尚字仁祖八歲神悟夙成父鯤嘗攜之送客或曰此兒一座之顏回也尚應聲曰坐無尼父焉別顏回席賓莫不歎異又曰盛彥字翁子廣陵人也少有異才八歲詣吳太尉戴昌昌贈詩以觀之彥於坐答之辭甚慷慨

又載記曰劉曜字永明年八歲從元海獵於西山遇雨止樹下迅雷震樹人莫不顛仆曜神色自若元海異之曰此吾家千里駒也

宋書曰裴松之字世期河東聞喜人年八歲學通論語毛詩博覽墳籍立身簡素

齊書曰徐孝嗣字始昌東海剡人也八歲襲爵枝江縣公

又曰王慈字伯寶琅邪臨沂人年八歲外祖宋太宰江夏王義恭迎之內齋施寶物恣聽所取慈取素琴石研義恭喜之

梁書曰王儉字公會錫第五弟也八歲丁父憂哀毀過禮

又曰劉之遴字思貞南陽涅陽人也八歲能屬文

又曰范雲字彥龍南鄉舞陰人晉平北將軍六世孫也年八歲遇宋豫州刺史殷爰于塗爰異之要就席雲風姿應對傍若無人爰令賦詩操筆便就坐者歎焉

又曰王規字威明琅邪臨沂人八歲丁所生母憂居喪有至性太尉徐孝嗣每見必爲之流涕稱曰孝童

又曰劉峻字孝標平原平原人父琨宋始興內史峻生朞月母攜還鄉里宋泰始初青州陷魏峻年八歲爲人所略至中山中

山富人劉實愍峻以束帛贖之教以書學

又曰何遜字仲言東海剡人八歲能賦詩

又曰何子季年八歲居憂哀毀若成人

又曰庾肩吾字慎之八歲能賦詩特爲兄於陵所友愛

又曰甄恬字彥約中山無極人八歲問其母恨生不識父遂悲

泣累日忽若有見言其形貌則其父也時以爲孝感

陳書曰徐陵字孝穆東海剡人也八歲能屬文

又曰陸從典字由儀幼而聰敏八歲讀沈約集見回文研銘從

典援筆擬之便有佳致

又曰謝貞字元立八歲嘗爲春日閒居五言詩從舅尚書王筠

奇其有佳致謂所親曰此兒方可大成至如風定花猶落乃追

步惠連矣由是名輩知之

又曰陸瓊字伯玉吳郡吳人也父雲公梁給事黃門侍郎掌著作大同末雲公受梁武帝詔校定棊品到漑朱异以下並集瓊時年八歲於客前覆局由是京師號曰神童异言之武帝有勅召見瓊風神警亮進退詳審帝甚異之

又曰王元規字正範太原晉陽人也八歲而孤兄弟三人隨母依舅氏往臨海

南史曰謝幾卿清辯時號神童父超宗徙越舊詔家人不得相隨幾卿年八歲別父於新亭不勝其慟遂投於江超宗命估客數人入水救之良久涌出得就岸漑耳目口鼻出水數斗十餘日乃裁能言

又曰何敬容字國禮弱冠尚齊武帝女長城公主拜駙馬都尉敬容惟有一子年始八歲在吳臨還與允別允問名敬容曰仍

欲就兄求名允即命紙筆名曰穀曰書云兩玉曰穀吾與第二家共此一子所謂穀也

又曰劉顯字嗣芳族伯璫儒學有重名卒無嗣齊武帝詔顯爲後時年八歲本名頴齊武以字難識改名顯

又曰任昉字彥昇樂安博昌人也父遙齊中散大夫昉八歲能屬文自製月儀辭義甚美褚彥回嘗謂其父曰聞卿有令子相爲喜之所謂百不爲多一不爲少由是聞聲籍甚

又曰邱遲字希範吳興烏程人八歲便屬文父靈鞠常謂氣骨似我黃門郎謝超宗徵士何點並見而異之

魏書曰祖瑩字元珍范陽道人也年八歲能誦詩書親屬呼爲聖小兒

又曰宋繇字體業八歲伯母張氏卒居喪過禮繇少而有志尚

喟然謂妹夫張彥曰門戶傾覆負荷在繇不銜膽自厲何以繼承先業遂隨彥至酒泉追師就學閉室誦書晝夜不倦博通經史諸子羣言靡不覽綜

北齊書曰永安簡平王浚字定樂神武第三子也初神武納浚母當月而有孕及產浚疑非己類不甚愛之而浚蚤慧後更被寵年八歲時問於博士盧景裕曰祭神如神在爲有神耶無神耶對曰有浚曰有神當云祭神神在何煩如字景裕不能荅

又曰博士韓毅教彭城王浹書見浹筆迹未工戲浹曰五郎書畫如此忽爲常侍開國今日後宜更用心浹正色荅曰昔甘羅爲秦相未聞能書凡人爲論才具何如豈必勤勤筆迹博士當今能者何爲不作三公時年蓋八歲矣毅甚慙

又曰徐之才丹陽人也八歲略通孝經義旨曾與從兄康造梁

太子詹事汝南周捨宅聽講老子捨爲設食乃戲之曰徐郎不用心思義而事食乎之才曰蓋聞聖人虛其心而實其腹捨嗟賞之

周書曰王述字長述少聰敏有識度年八歲太祖見而奇之曰王公有此孫足爲不朽即以爲鎮遠將軍拜太子舍人

隋書曰庾季才字叔奕新野人也幼穎悟八歲誦尚書

又曰庾質字行修少而明敏蚤有志尚八歲誦梁世祖元覽言志等十賦拜童子郎

又曰諸葛穎字漢丹陽建康人也年八歲能屬文

又曰蘇夔字伯尼京兆武功人少聰敏有口辯八歲誦詩書兼解騎射

又曰何妥字棲鳳西城人父細胡通商入蜀遂家郫縣事梁武

陵王紀主知金帛因致巨富號爲西州大賈安少機警八歲遊國子學助教顧良戲之曰汝旣姓何是荷葉之荷河水之河應聲荅曰先生姓顧是眷顧之顧是新故之故眾咸異之

北史曰鉅平縣公欽子子孝字季業蚤有令譽年八歲司徒崔光見而異之曰後生領袖必此人也

唐書曰嚴武字季鷹幼豪爽母裴不爲父挺之所答獨厚其妾英武始八歲怪問其母母語之故武奮然以鐵鎚就英寢碎其首

又曰孔穎達字仲達冀州衡水人八歲就學誦記日千餘言闇記三禮義宗

又曰哥舒曜字子明八歲元宗召見華清宮擢尚輦奉御

又曰徐齊暉字將道湖州長城人八歲能文太宗召試賜所佩

金削刀舉宏文生

又曰余常安父叔皆爲里人謝全所殺常安八歲已能謀復讐
十有七年卒殺全

舊五代史曰羅周敬鄴王紹威之第三子也八歲學爲詩往往
傳於人口

宋史曰慕容延釗子德豐幼聰悟延釗愛之嘗曰興吾門者此
子八歲補山南東道衙內指揮使

又曰范純仁字堯夫八歲能講所授書

又曰劉庠字希道八歲能詩

又曰郭諮字仲謀趙州平棘人八歲始能言聰敏過人

又曰李舜臣字子思八歲能屬文

又曰蔡元定字季通八歲能詩日記數千言父發博覽羣書號

言金鑑卷四
牧堂老人以程氏語錄邵氏經世張氏正蒙授元定曰此孔孟正脉也元定深涵其義

又曰劉恕字道源筠州人八歲時坐客有言孔子無兄弟者恕應聲曰以其兄之子妻之一坐驚異

金史曰孛術魯阿魯罕年八歲選習契丹字

案金史國語解姓氏孛術魯曰魯

又曰張元素字潔古易州人八歲試童子舉

元史曰岳柱字正所一字兼山方八歲觀畫師何澄畫陶母剪髮圖岳柱指陶母手中金釧詰之曰金釧可易酒何用剪髮爲也何大驚即易之

又曰別兒怯不花八歲以興聖太后及武宗命侍明宗于藩邸尋入國子學爲諸生

又曰劉秉忠字仲晦初名侃因從釋氏又名子聰拜官後始更

今名八歲入學日誦數百言

又曰李稷字孟幽滕州人八歲能記誦經史

又曰歐陽元字原功幼岐嶷母李氏親授孝經論語小學諸書八歲能成誦始從鄉先生張貫之學日記數千言即知屬文

明史曰張以寧字志道古田人父一清元福建江西行省參知政事以寧年八歲或訟其伯父於縣繫獄以寧詣縣伸理尹異之命賦琴堂詩立就伯父得釋以寧用是知名

又曰王洪字希範錢唐人八歲能詩

又曰劉溥字原博長洲人八歲賦溝水詩時目爲聖童

案南濠詩話云

長洲劉先生溥八歲時賦溝水詩門前一溝水日夜向東流借問歸何處滄溟是住頭

又曰何景明字仲默信陽人八歲能詩古文

蘇州志曰韓治字君理長洲人八歲能書徑尺大字董其昌目

之爲神童

續文獻通考曰程敏政休寧人八歲以神童薦英宗試聖節及瑞雪詩並經義各一篇援筆立就詔讀書翰林院官給廩饌

又曰元陰幼遇奉新人八歲中九經科

莊子曰蒲衣子八歲而舜師之

搜神記曰羅威字德仁八歲喪父事母性至孝

世說曰張吳興元祖年八歲先達知其非常故戲之曰君口中河爲開狗竇張應聲荅曰正使君輩從此出入

又注曰孫放年八歲太尉庾公召見之問曰爲欲慕莊周耶放荅曰意欲慕之公曰何故不慕仲尼而慕莊周放曰仲尼生而知之非希企所及至於莊周是其次者故慕耳

東觀餘論曰宋慎漢公八歲真靖陳尊師稱其善學鍾王遺法

以神童目之

列卿記曰楊一清字應寧丹徒人年八歲以奇童薦入翰林爲秀才

稗史曰黃魯直少警悟八歲能作詩送人赴舉云送君歸去明主前若問舊時黃庭堅謫在人間今八年

湧幢小品曰王厚孫應麟之孫八歲能詩

名山藏曰卓晚春莆田人八歲善算雖累千萬不爽言休咎皆奇中

芝田錄曰李義甫八歲舉神童文皇在上林有搏得烏者義甫進烏詩曰日裏揚明采琴中伴夜啼上林如許樹不借一枝棲上曰朕將以全樹借汝矣

廣漠野語曰待詔周清誠八歲時鄰人見曬曲屋上出對曰屋

上直曬兩行曲應曰門前低叫一聲高蓋適賣糕者過也
澹生堂藏書約曰向朗年八歲即手自校書刊定謬誤潛心典
籍積聚篇卷冠於一時

山房隨筆曰南康建昌縣有神童山每大比試童子至百人七
取其一有鄧文龍年八歲穎出諸童子右方岳巨山守南康欲
祝爲子父謂之曰汝予所鍾愛太守固欲祝汝將若何文龍曰
第許之巨山一日招諸名士如馮紫山深居兄弟者而鄧父子
與焉席上太守及諸公祇服褙子文龍以綠袍居座末坐定供
茶文龍故以托子墮地諸公戲以失禮文龍曰先生釵衣學生
落托衆爲一笑酒酣巨山戲曰口紅衣綠如鸚鵡文龍應曰頭
白形烏似老鴉又令賦君子竹即詠曰蕭灑子猷宅平將風月
分兩軒渾似我一日可無君衆異之後易名元觀